



## Program Singgah Sahur bantu erat hubungan dengan masyarakat

Seramai 200 orang dalam kalangan staf dan pelajar Universiti Malaysia Pahang (UMP) bersama gabungan Kelab Proton Waja Negeri Pahang menganjurkan Program Jom Singgah Sahur yang buat julung kalinya dianjurkan tahun ini melibatkan beberapa agensi.

Program mendapat kerjasama daripada Auto Speed Owners Club (ASoC), Kelab Rakan Muda Paya Besar dan Kelab Penyayang UMP. Turut menjayakan program Persatuan Wanita UMP (Matahari), Komuniti Perwani 1 Malaysia dan Jabatan Pembangunan Wanita Negeri Pahang.

Majlis pelepasan konvoi disempurnakan Timbalan Naib Canselor (Hal Ehwal Pelajar & Alumni) UMP, Profesor Dato' Dr. Yuserrie Zainuddin di perkarangan Dataran Canseleri UMP Kampus Gambang pada malam 18 Julai 2014 yang lalu.

Dalam ucapannya beliau berkata, tujuan program diadakan adalah bagi merapatkan hubungan antara pelajar dengan orang luar

serta memasyarakatkan kampus. Program ini memfokuskan terhadap mereka yang bekerja pada waktu malam terutamanya dalam kalangan penjawat awam dan agensi kerajaan dengan berkonsepkan singgah bermesra dan menyerahkan sumbangan juadah bersahur kepada mereka.

Program Singgah Sahur ini juga mendapat kerjasama yang baik apabila Pengerusi Jawatankuasa Pembangunan Wanita dan Keluarga, Komunikasi dan Multimedia Negeri Pahang, Dato' Shahaniza Shamsuddin. Turut sama hadir menyampaikan bungkusan makanan untuk sahur kepada petugas di hospital HTAA ialah Ketua Timbalan Pendaftar UMP, Datin Fazia Ali, Pengarah Hospital Tengku Ampuan Afzan (HTAA), Datuk Dr. Marlia Mohammed Salleh dan Pengarah Jabatan Pembangunan Wanita Pahang, Nurul Aini Mohammad.

Menurut Dato' Dr. Yuserrie, program yang melibatkan pelajar dan staf UMP serta komuniti setempat ini dapat merapatkan hubungan di antara peserta dan masyarakat luar serta memahami kehidupan bermasyarakat dan memupuk nilai-nilai murni peserta.

"Peserta turut cuba menyelami suasana bersahur ketika pihak beruniform seperti pasukan Polis Diraja Malaysia (PDRM), Kementerian Kesihatan Malaysia, Bomba,

Jabatan Pertahanan Awam Malaysia (JPAM), RELA dan Jabatan Pengangkutan Jalan (JPJ) yang bertugas menjaga keselamatan dan ketenteraman awam terutamanya pada waktu malam hari," katanya yang hadir bermesra dengan peserta.

Katanya, penglibatan pelajar dalam program ini memberi peluang kepada mereka mendekati masyarakat dan menjalinkan kemesraan terutamanya ketika berkunjung ke rumah anak yatim dan bertemu dengan warga emas.

Malahan, usaha ini dilihat mampu memberikan pendedahan kepada pelajar mengenai realiti kehidupan dalam masyarakat hari ini.

Bagi pengarah program, Badrul Naim Abidin berkata, program ini memberi peluang kepada peserta konvoi untuk makan sahur bersama-sama serta memupuk kesedaran para peserta betapa pentingnya kasih sayang untuk dirasakan oleh anak-anak yatim.

Peserta konvoi melibatkan 100 kereta dan motosikal yang terdiri daripada ahli Gabungan Kelab Proton Waja Negeri Pahang dan Auto Speed Owners Club (ASoC).

Sebanyak 20 lokasi persinggahan termasuklah Sekolah Maahad Tahfiz, Balai Bomba Indera Mahkota, Hospital Tun Ampuan Afzan, Rumah Orang Tua Sungai Soi, MABIQ Tanjung Lumpur dan Permata Camar. Program berakhir dengan bersahur bersama-sama dengan anak-anak yatim di Permata Camar.

